



## 落雨

受著風搓外圍環流个影響，南部已經落地幾下日个雨，天時乜過涼地。好得大體係細雨毛仔，毋係發風落雨。這滿立秋都過地，跨秋雨落一擺就涼加一分，到半夜仔，眠在竹蓆頂項或者憑著壁，都感覺著冰冰涼涼，冷氣、電扇都做得切核，驚寒个人怕愛蓋細毯仔地。

寫詩、填詞、寫文章感性个文人怕盡愛落雨。落雨滴滴答答个聲，打著屋簷、打著樹仔、打著水池，都係好聽个音樂節奏。濛濛細雨點盡像珠簾，一串一串跌落地泥，有淒涼个美感。雨水將厝槽个大地洗清淨來，連空氣都有淨淨个味緒。落雨个時節，無擎遮仔个人毋係共快走去廊仔下庇，無就爽爽快快个分佢逐，遮仔像一蕊一蕊靚靚个花，這風景做得看出人个个性，也欣賞得著落雨天烏陰以外，遮仔變化出來个色彩。

還細時，電視媒體還無恁發達，氣象報告淨每日三擺个新聞時間正有報導。係像這個風搓在南海，會走對廣東去，無直接對臺灣來，基本上也毋會特別講。大部分个民眾淨知有落雨，毋知附近就有風搓，因為對生活無麼个大影響。讀小學時，記得乜差毋多學校愛開學个這個時節，不時都會落雨，看著烏陰天，佢等就最好著水衣、水靴去學校，行到有積水个所在，特別好去涉水搞！等到上課地歸教室，水靴脫下來，看腳趾浸水浸到皮皺皺，大家正互相噓，先生仰仔罵乜罵毋聽，細人仔根本毋驚撩水過會有細菌傳染个问题。毋過，佢實在懷念細細時無愁無慮个日仔！連落雨也做得搞到暢到無結煞。

大家印象最深个應該係莫拉克風搓帶來个暴雨。該雨在南部山區落一日一夜，落地一年雨量个一半，恁短个時間落恁多个雨，河壩瀉水瀉毋利，山林土地含水量乜忒大，造成盡多所在崩山、土石流，靚靚个家園就恁仔消失，埋核幾下百人个命！這種世紀大災害，係還有可能發生个。最近米國个超級風搓哈維帶來个雨量，也係百年來罕得見个災難。佢想，不管東方、西方，應該都希望係風調雨順，照天時節氣來落雨。

雨水係淡水重要个來源，臺灣係細細个島，河水盡遽就流到大海去地。雖然起地蓋多座水庫，假使雨水落啊蓋集中，水庫滿地還係共樣愛瀉核，無法度挾蓋多水。等無落雨時，水庫又燥燜見底，大家正又愁會限水。水資源實在盡珍貴，除核欣賞落雨个心情，乜愛想著好好珍惜水資源。

作者：吳秀梅

### ☆詞彙學習☆

【跨秋雨】kia qiu' i'：季節將轉為秋天時所下的雨。

【擎遮仔】kianǎ' za' e'：撐傘。

【庇】bianǎ：躲藏。

【涉水】zeb sui'：涉水、踩踏積水處而過。

【撩水】liau' sui'：撥弄、涉水而過。

【瀉毋利】xia m' li：水洩不及。

【挾】hiab'：貯存。

【燥燜】zau' hog'：乾涸。

### ☆文法學習☆

【淨知】qiang di'：只知道。「淨」為副詞，是「單、只」的意思。例：淨曉得（只會）、淨會（只會）、淨有（只有）。